

東
華
續
錄

東華續錄

同治七十八

臣王先謙敬編

臣張式恭恭校

夏四月癸卯朔諭軍機大臣等劉嶽昭奏整軍相機進剿請飭各省迅解欠餉一摺滇省自尋甸兵潰後匪勢猖獗楊林又復被圍劉嶽昭派令副將何秀林等前往援應旋以眾寡不敵失陷營盤劉嶽昭之兵一蹶竟不復振實屬不能得力著該督振刷精神認真整頓以肅軍律省城根本重地逼近賊氛岑毓英獨力難支情形甚爲喫緊該督見與岑毓英商定嚴守曲靖以通餉道而固省城後路仍須隨時妥爲策應不得株守一隅總兵謝景春全祖凱等已分扼霑益東川等處各路要隘雖均有兵守禦惟賊蹤飄忽劉嶽昭等仍當檄令各員嚴密防守毋令有隙可乘一面相度機

宜跟蹤進剿毋任蔓延並催令唐友耕等軍由東川進攻尋甸之
北四面兜剿以期一鼓殲除至滇省餉需異常支絀浙江江西湖
南廣西山西四川廣東歷年應解滇餉積欠甚多著瑞麟吳棠鄭
敦謹李瀚章劉坤一劉崑李福泰蘇鳳文文輝各將該省欠解滇
餉於三箇月內全數起解赴滇以顧大局此項餉銀到時著劉嶽
昭岑毓英均勻撥用以資飽騰將此由五百里諭知瑞麟吳棠劉
嶽昭鄭敦謹李瀚章劉坤一劉崑李福泰蘇鳳文岑毓英並傳諭
文輝知之○廣湖南耒陽縣學額一名○予浙江陣亡道員繆梓
祭葬世職建祠並雲南陣亡副將饒漢卿等祭葬世職○甲辰
上詣 大高殿祈雨○乙巳諭內閣福濟錫綸奏大員遇事推諉
辦理諸多掣肘據實直陳請旨遵行一摺前因杜爾伯特旗未能
安插厄魯特人眾諭令烏里雅蘇台將軍麟興於喀爾喀四愛曼

內分置乃該將軍奏稱喀爾喀並無隙地咨明福濟等另行酌議
朝廷已疑其畏難不辦復諭令安商安插茲據福濟等奏稱喀爾
喀幅員較廣可以分安麟興並未向各盟勸導率行推諉且所奏
各情前後自相矛盾該將軍身膺重寄於安插厄魯特一事關繫
北路大局乃堅執已見藉詞搪塞實屬居心巧滑溺職孤恩麟興
著革去烏里雅蘇台將軍及鑲紅旗蒙古都統加恩仍畱公爵回
旗當差以示懲儆○諭軍機大臣等福濟錫綸奏大員遇事推諉
及請毋庸截畱餉銀並查明分界內無塔城管轄之地各摺片麟
興久在北路因其情形尙爲熟諳令膺將軍重寄乃於安插厄魯
特一事種種推諉取巧不顧大局實屬孤恩溺職殊堪痛恨見在
將軍一缺既簡放福濟該將軍受茲異數當思北路安危所繫於
安插人眾等事實心經理以副委任前據麟興等請酌畱布倫托

海餉銀四五萬兩原以備巴里坤哈密調兵安臺之費見在防兵
既已停止調往而安插索倫諸費又由布倫托海經理所有前請
酌畱布城餉銀卽著福濟榮全錦丕勒多爾濟知照錫綸停止以
歸實用瑪呢圖噶圖爾幹卡倫旣在科布多地界並著奎昌明瑤
悉心經理毋稍推諉將此由五百里各諭令知之○丁未予陝西
陣亡翰林院編修王鳳翔建祠○戊申湖南官軍復貴州清江廳
城賞提督榮維善等珍物子陣亡副將黃時貴等祭葬世職○己
酉左宗棠劉典奏提督高連陞軍變被戕經臣等於三月初一日
馳報維時首逆丁玉龍鄔宏勝朱得達等尙未捕獲臣等嚴飭各
營分投躡緝務期罪人斯得旋據前路左營總兵陳光明代理洛
川縣知縣喻長銘馳報二月二十六日盤獲首逆鄔宏勝初猶詐
稱吳德勝經同時獲案之馬夫陳茂生當面質認確是二月二十

夜倡亂手戕高連陞之鄔宏勝據提督丁賢發報在耀州陸續捕獲首逆朱得達黃上輔及逆黨熊松貴焦得興田興發唐占龍羅有元楊長福楊廣舒等七犯豫知逆謀之鄧占武等十一犯當經檻送臣典三原行營臣典提訊各犯立即正法以朱得達黃上輔情節尤重飭解臣宗棠乾州行營彙案審辦三月初六日據陝西提督雷正綰提督周蘭亭報稱三月初二日首逆丁玉龍熊定邦羅興萬李長林及逆黨吳得勝即吳步雲等百餘人竄至長武之窯店雷正綰周蘭亭分途截擊立將丁玉龍等悉數擒獲起解臣宗棠於三月初七十六等日各犯解到時親提研鞫首逆丁玉龍鄔宏勝認係哥老會匪頭目倡首謀變戕害統將不諱比設高連陞黃毓馥賀茂林及同時遇害各員弁之靈臣宗棠親手加刃飭將該五犯磔誅剗心致祭叛弁黃上輔羅興萬吳步雲即吳麻子

叛卒汪宏發七十三犯訊皆同豫逆謀到楊店攻同官縣城古泉營壘經官軍擊散折由馬欄鎮出山河鎮擬投回巢適聞回巢已傾折而趨長武窯店始就擒者訊畢概與斬梟據知府劉倬雲總兵張福齊報捕獲叛卒蔡鳳耕等犯亦皆軍前斬決梟示統計高連陞一軍叛弁勇丁除陣斬千三百餘名外捕獲訊決者計一百八十餘名其未變之後營及前營三哨已飭改歸署漢中鎮總兵李輝武統帶丁賢發桂錫楨等所收被脅之勇丁一千五百餘名分爲三營以兩營歸丁賢發統帶以一營歸記名道魏光燾統帶提督周紹濂總兵張福齊所收被脅勇丁六百餘名除補缺額外各編列隊伍安插所部各營中而事已大定所有同時遇害之提督銜湖南補用總兵黃毓馥總兵銜補用副將賀茂林花翎同知銜浙江補用知縣謝生春四川補用副將高英舉守備吳學谷千

總余永福把總朱云發從九潘甫一從九張西堂監生方甫臣倉卒遇變遭禍最慘應懇 天恩飭部照原階原資議給卹典並請

旨准其附祀高連陞專祠以慰忠魂查異變之起由於左營該營官總兵銜副將楊玉魁駐營米子窯距高連陞楊店老營三十里高連陞查拏會匪丁玉龍丁玉龍逃匿該營遂約該營差弁鄔宏勝哨長熊定邦朱得達大旗李長林黃上輔遽起爲變夤夜闖入楊店老營戕害統將據該營官供稱二月二十夜叛卒出營時曾向其截阻被傷驗明傷痕屬實訊之首逆鄔宏勝所供亦同然首逆皆出自該營丁玉龍又匿避該營糾約起事該營官縱不豫知逆謀究亦無所逃罪總兵銜副將鄧玉魁駐營宜君縣城於哨長蔣宏高郭見寅李廣全結拜哥老會時漫無覺察與楊玉魁均被叛卒劫赴楊店大營同攻同官縣城經官軍剿敗後始同楊玉魁

投營自首厥罪維均管帶中營四哨總哨官補用總兵唐畢賢駐營楊店二十夜之變該總兵不但未能力遏兇鋒救援統將且所管三哨一時均變隨同攻撲同官縣城事敗投臣劉典行營哭訴憂憤訊據生擒叛卒供稱該總兵亦是會內香長是該總兵因迷惑既深意存觀望可知楊玉魁鄧玉魁唐畢賢情罪重大見均押解乾州監禁應請旨一併立正典刑以彰國法總兵銜副將周廷興駐營古泉二十夜五更丁玉龍鄔宏勝率叛勇至古泉脅該營同變該營通逆之弁勇起而內應周廷興立刃數賊忽大股叛勇蠡擁而入周廷興立與格鬪右手右耳左膊右腿均受刀矛重傷各叛卒誤謂已斃委之而去所部弁勇俟叛卒既去乃舁置山谷垂絕始蘇赴耀州具稟見因傷重未痊尙畱耀州醫治管帶副後營畱甘補用道楊銘潛駐管金鎖關距楊店老營七十餘里二十

一日聞變帶所部過同官邀桂錫楨赴援甫行訶知叛卒來撲卽與桂錫楨商同守城兼保糧局因招本營上城致叛卒矛傷左足楊銘濬手刃登城叛卒危城全保亦與有力周廷興楊銘濬兩員於此案情節最輕平日素稱謹樸應否請旨暫行革職仍畱營差遣俾昭平允之處伏候 聖裁 上諭內閣前因甘肅提督高連陞軍變被害疊諭左宗棠等詳查究辦茲據該大臣等奏將全案各情審明具奏此案副將鄧玉魁駐營宜君縣城於哨長蔣宏高等結拜哥老會時既無覺察復與副將楊玉魁均被叛卒劫赴大營同攻宜君迨經官軍剿收始同楊玉魁投營自首補用總兵唐畢賢駐營楊店所管三哨一時同變事前不能救援統將事敗始投劉典軍營並據叛卒所供亦係會內香長見均經逐款訊明押解乾州監禁該犯等情罪重大未便稍事稽誅鄧玉魁楊玉魁唐

畢賢均著卽行正法以伸國憲副將周廷興道員楊銘濬未能力挫兇鋒本有應得之咎惟或因格鬪受傷或因守城出力情節尙屬可原周廷興楊銘濬均著暫行革職仍畱營差遣○左宗棠奏廣東提督劉松山率師由山西永甯州渡河而西設採買糧局於永定州之軍渡畱所部中軍三五兩旗及記名提督蕭章開所部右軍後旗勇夫轉軍渡之糧於綏德比埽蕩而西距綏德又遠又畱記名提督易德麟所部前軍後旗記名提督蘇松鎮總兵章合才所部左軍左旗駐綏德轉綏德之糧於周家嶺一帶比抵鎮靖堡復裹糧西期靖邊土匪定邊回匪又飭易德麟率所部前左右三旗駐瓦窯堡轉周家嶺一帶之糧於鎮靖堡以餉前敵各軍兼哺降眾計自軍渡糧局渡河經綏德州周家嶺瓦窯堡以抵鎮靖堡山程往返共一千零八十里各勇夫散布各處絡繹載送其駐

綏德者時需輪替遞運分統之員僅章合才往還監護巡視不常厥居以故游匪竄匿其間潛相煽惑無從察禁此變之所由生也二月十三日游勇勾結綏德州城內外各營起事襲踞州城當變出倉卒時風謠所播人心震駭傳聞異詞不特劉厚基金順據城中逃出土民傳說訛誤頗多卽臣等所據何作霖軍渡來稟及成定康陳瑞芝等所稟情形亦均係游匪叛卒踞城以後謠傳其於游匪叛卒姓名及被脅弁丁固未能指實也茲據劉松山稟二月十七日在洛珠川行營接章合才急報十三日午後由義合鎮糧局察收糧石回州中途突聞游匪滋事州城已被襲踞城內外存營弁勇或被其勾結入夥或被脅入城或乘間逃走其挑糧未歸之弁勇押糧未歸之營哨各官又皆未帶軍械無以制賊東路則折向宋家川西路則竄赴周家嶺形勢倉皇失所依據劉松山得

報卽並蕭章開所部由洛川折由瓦窯堡南趨飭易德麟帶所部會師清澗沿途偵知營務處提督黃萬友所部中軍第六旗聞變時已交總哨帶赴瓦窯堡而何作霖又已將三五兩旗調過東岸知叛卒零星湊集不能抗拒大軍也二十二日馳抵瓦窯堡派提督曹義勝赴綏德察各軍反狀二十三日抵清澗章合才率馬隊三營來會二十四日曹義勝自綏德州飛馬來報城中各營不知統將動靜人心惶惶曹義勝至密告已抵清澗則大喜二十三日四更乘各遊匪酣卧殺斃百餘名叛卒二十餘名弁勇之被脅者遂乘勢反正縛哥老會首謝永青唐太春方經山胡泰江童嘉隆等五犯解清澗行營成定康所部之在城內者亦隨之俱行二十五日到清澗劉松山提訊謝永青唐太春據供前在湖北軍營當結拜哥老會匪陸續來至綏德旬煥城內外各營勇丁甫數百人

不料被新夥暗算遂致破案訊畢斬之各營哨官什長指出叛卒一百二十七名供認不諱概予斬決在營各哨官參將銜補用遊擊羅忠桂湯惠能補用遊擊王福升補用都司黃忠貴察訊情節較重一併軍前正法劉厚基於二十五日由米脂帶隊馳抵綏德與署綏德州知州陳瑞芝收復城池二十六日進至石鵲驛搜獲逸匪吳得勝楊占魁斬之聞事平仍回米脂郭寶昌行至延川聞事平亦引軍還自會匪勾結叛卒起事迄事平甫閱旬日首逆悉數縛誅大局收定臣等見仍嚴飭成定康陳瑞芝劉厚基等察輯游勇會匪務期淨絕以遏亂萌一面咨令劉松山乘軍情安謐之後逐一清楚整頓至綏德軍變與高連陞軍變事起同時論者疑其或有交通情弊則固不然無論綏德去宜君千餘里山谷阻隔聲息難通且高連陞所部名雖楚軍實則勦平廣西江西閩浙粵

東髮逆所收降人居多其隸川黔者尤多哥老會蓋哥老會者本川黔舊有咽喉匪之別名也昨訊決之首逆丁玉龍朱得遠李長林羅興萬黃上輔等皆籍隸貴州四川首逆鄒洪勝熊定邦皆籍隸江西與綏德首要各逆出自湖廣河南者有別雖同一哥老會匪而氣類攸分也劉松山治軍紀律嚴明恩信素著故弁丁聞其還旆清澗卽倒戈相迎而劉松山以此憤積於中義形於色上書臣宗棠懇求奏請從重治罪臣等未敢壅於上聞應否寬免之處出自 鴻慈逾格臣等未敢妄擬此案失察之咎該軍分統及營官哨長均有難辭前署綏德州知州成定康見署綏德州知州陳瑞芝亦有應得之咎容俟察覈明確分別辦理惟綏德宜君兩逆案情罪實有不同宜君楊店之變因拏辦哥老會匪迫而爲亂竟敢謀通同逆撓亂大局戕害主將營官及差官幕友多人攻犯城

池情罪重大無以加之綏德則未嘗戕害所管將弁未嘗勾通外
寇竄端實由游匪勾煽而起倡首正犯固罪無可逃被脅各卒情
似可恕臣等愚昧之見未知當否 上諭本年二月間陝西綏德

州營勇突被游匪勾結叛踞州城經提督劉松山率蕭章開等會
合總兵章合才所部由瓦窯堡馳抵清澗殲游匪百餘名叛卒
二十餘名被脅將弁勇乘勢反正縛匪首謝泳青唐汰春訊係自湖
北勾結會匪陸續至綏德煽亂當經處斬其指出敗卒一百二十
七名及叛將羅忠貴湯惠能王福升黃忠貴一併正法收復綏德
州城池搜獲逸匪吳得勝楊占魁斬之軍情大定此案劉松山有
統率將弁之責不能先事防範卽予從重治罪亦屬咎有應得姑
念該提督平日打仗尙屬奮勉加恩免其治罪著交部議處前署
綏德州知州成定康見署綏德州知州陳瑞芝亦有應得之咎均

著革職畱任失察之營官哨長著左宗棠等查明分別參處此次
綏德勇變除倡首之犯務獲正法毋許一名漏網外其餘被脅反
正弁勇概免追究以示區別○左宗棠奏官軍追剿回逆蕩平賊
巢業經臣等於三月初一日先將大略情形馳報續據各軍收隊
回防先後稟報該逆自二月初八日敗遁回巢紛議北徙復聞臣
宗棠率師西指各路馬步剋期大舉恟懼益甚遂於十八日集議
蕭金鎮併十八營爲四大營以其半護家口輜重先行畱崔魏馬
正和等率悍黨萬餘伏董志原斷後時出游騎數百由泰昌政平
等鎮紛擾涇河兩岸以牽綴官軍維時陝安道黃鼎自邠州率師
會固原提督雷正綰於長武記名提督馬德順道員李耀南亦率
馬步各軍屯駐靈臺百里西屯鎮一帶均遵臣等前檄儲備十日
乾糧伺賊竄動卽銳進追之二十二日探報賊老弱輜重均已離

巢分向驛馬關三汊河北竄辰刻雷正綰黃鼎率師自長武渡涇
午後馬德順李耀南亦率馬步各營由靈臺踵至均會師於秦昌
時精悍賊眾悉伏董志原僞元帥崔巍等率騎千餘扼三不通憑
溝抗拒是夕各統領會商以賊既萃於三不通則荔家堡西路必
空虛無備議以雷正綰撥所部總兵陳義步隊六營馬德順派所
部提督楊世俊馬隊四營由秦昌入荔家堡取蕭金鎮西路以達
鎮原迎頭截剿餘軍分爲四隊以李耀南所統恪靖馬隊爲前鋒
馬德順馬隊繼之雷正綰黃鼎馬隊爲左右翼各軍步隊隨後排
列而進均由三不通一路直搗賊巢會商已定二十三日五鼓各
軍秣馬蓐食分道進攻辰後行至邱家寨該逆游騎數百瞥見卽
遁各軍風馳電掣直抵三不通時賊騎千餘排列卡外官軍馬隊
徑前衝撲賊恃險力拒槍礮分注如雨馬隊往來衝擊均爲深溝

所限卒不得前正相持閒適步隊各軍分由左右路踰溝衝上平原繞出賊卡之後賊驚駭失措馬隊乘勝衝入槍礮矛刺賊不能支紛紛敗竄原上伏賊甫出抵禦又爲敗賊牽動相率狂奔官軍跟蹤緊追斬殺千餘名復分軍循馬連河而上遂將焦村什社蕭金鎮董志鎮一帶賊巢同時踏毀沿途百餘里賊屍枕藉拋棄騾馬軍械無算餘賊策騎飛馳悉向西峯鎮北走是夕各軍駐董志原二十四日五鼓拔隊跟追辰後抵西峯鎮據擒賊供稱賊前起老弱輜重因人馬眾多未能卽遁相距不過一日之程其殿後悍賊爲各軍追逼漏夜奔竄一由驛馬關以出環縣一由蒲河川以向三汭河約在黑城子下馬關會齊同竄豫望城半角城金積堡一帶維時前派之提督楊世俊總兵陳義兩軍自荔家堡上原出西路掃蕩而前沿途斃賊甚眾已將鎮原縣城收復當經各軍統

領會商雷正綰李耀南步隊出蒲河川會合楊世俊陳義馬隊於鎮原追勦三汊河一股其竄驛馬關環縣之賊則馬德順黃鼎率馬步緊追之午後馳抵驛馬關及賊尾隊各軍爭先馳擊斬落後賊十餘名追二十里至黨家腰綫山徑偏仄兩旁溝深數十丈賊大隊擁塞急不得脫崔巍馬正和等見勢危急親督悍黨數百人阻隘死拒官軍奮威衝殺槍礮矛刺立斃悍賊十餘名回目撥馬先逃餘逆紛紛敗竄人馬自相蹂躪墜落坑塹者無算官軍追殺五十餘里約其斃賊數千名連夜躡蹤窮追二十五日收復慶陽府城二十六日追至蔡家廟沿途斬殺又多餘賊竄過環縣由紅德城一路北走各軍追之不及遂於二十七日收回董志原其雷正綰李耀南兩軍於二十四日由西峯鎮出蒲河川二十五日會楊世俊陳義之師於鎮原各追至孟壩寺截殺尾賊數百名復追

及前隊於三汭河賊護其家口輜重先行而以悍騎數百扼險抗拒各軍馬隊徑前衝撲步隊從旁排列而進槍矛迭施賊不能支四散奔竄拋棄騾馬輜重填塞道途落後之賊悉被斬獲官軍蹶追八十餘里至白馬鋪斬馘千計二十六日追至洪河川賊去已遠軍中裹糧將罄遂亦收隊回蕭金鎮二十九三十等日各軍以次均回原防統計是役殺斃俄斃之賊及墜崖而死者實不止二三萬人騾馬之倒斃餓斃及被各軍奪獲者約二萬餘匹拔出難民萬餘拾獲軍械無數慶涇各屬一律肅清竊維董志原地居秦隴要膺本唐之涇原宋之環慶故地昔時設立重鎮以精兵宿將駐之藉以控制遐荒撫綏雜虜形勢之重自古已然陝回竊踞以來遠近城邑寨堡慘遭殺掠民靡孑遺平慶涇固之閒千里荒蕪彌望白骨黃茅炊煙斷絕被禍之慘實爲天下所無此次乘其竄

動急追猛勦積年蟻穴接蕩一空賊之精騎悍黨銷亡殆半機局
本有可乘惟師行所至井邑俱荒水涸草枯賊因此而多所喪亡
官軍亦因此而艱於追逐又其時適值內變紛乘北路官軍因內
顧不遑未克橫衝側擊其赴師期一收聚殲之效是則臣等所耿
耿不能自釋者也見詞該逆由環縣固原兩路竄至下馬關復由
下馬關分竄蕭河城豫望城半角城金積堡一帶賊情渙散不但
陝回與甘回因剽掠而肇衅生端卽陝回之向分東彌西彌者亦
因喪敗而各懷怨恨陝甘回患庶有止息之期此時所最急者宜
乘時耕墾擇要興屯以活遺黎而弭飢寒之迫以儲軍食而銷譁
變之萌庶內政旣修軍民漸有固志乃可徐圖進取斷不宜苟目
前旦夕之效求速反遲又蹈從前覆轍也其目前兵事所宜急籌
者如駐軍董志原扼秦隴兩省關鍵駐軍秦州通蘭州一綫餉道

駐軍正甯甯州之閒爲進慶陽之謀駐軍涇州爲通平固之漸皆主固秦以規隴自東徂西者形勢之自然由近及遠者行軍之次第既不敢濡滯而坐失機宜亦不敢造次而貽譏壯往一切規畫皆於無可設法中竭蹶圖之事同枵腹始艱阻萬狀臣等惟有虛衷商榷殫誠盡瘁以求下紓民難上慰慈懷其有濟與否則固未能逆計也至此次各軍將士徑擣積年老巢轉戰數百里不遺餘力洵屬著有微勞應請先予獎敘以酬勞勩上諭軍機大臣等董志原地居秦隴要膂久爲回逆老巢經官軍此次痛剿克復慶涇各屬一律肅清該逆由環縣固原兩路北竄下馬關等處左宗棠等因襄糧將盡仍令各軍回駐原防擬擇要興屯徐圖進取固屬老成持重第當此得勝之餘軍威大振同情渙散甘肅各匪經此懲創自必大爲震懾若能乘勢進剿必當事半功倍儻遲遲進取

恐回逆結謀抗拒轉形費力著左宗棠將糧餉等事與劉典妥商
後卽行西征隴回並馳至涇州接受總督關防擇要駐紮居中調
度以期秦隴兩省得以兼顧至延安一帶地方是否安謐扈彰有
無反側董幅祥是否歸降興辦兵屯應如何經畫左宗棠籌定後
卽可交劉典經理免致失此機會穆圖善於左宗棠未到甘肅以
前仍當將金積堡等處竄回盡力堵剿毋令軼出邊外勢成蔓延
左宗棠另摺奏查明劉松山及高連陞兩軍變亂情形均已明降
諭旨將劉松山等分別議處革畱及副將楊玉魁等正法其未獲
之蔣宏高石文科仍著左宗棠等隨時嚴拏毋任漏網見在高連
陞所部陣斬及擒獲正法者人數甚多未變各營改派李輝武等
統帶尙屬妥協著卽飭該統領等妥爲鈐束不可稍涉大意致生
事端將此由六百里各諭令知之○予甘肅被戕總兵官黃毓馥

等祭葬世職○辛亥詔問刑各衙門清釐積案○癸丑 上詣

大高殿祈雨○乙卯諭軍機大臣等金順奏回逆趨重北路見籌

進剿一摺回匪盤踞磴口烏喇特等處蔓延及纏金日漸東趨董志
原回逆數千又擾及定邊迤西大水坑一帶旋復他竄騎賊由橫
城附近出邊者絡繹不絕後套情形甚爲喫緊該處地土沃饒爲
甘軍糧源所出若被該匪竄踞關繫非輕金順見已派副都統常
福先赴達拉旗探剿卽擬親率各營進規烏喇磴口所籌甚是著
卽迅速前進向賊匪趨重之處迎頭痛剿截其東竄疏通甘軍糧
路兼爲甯郡聲援邊外地方遼闊若賊匪分股肆擾必須分兵兜
擊金順所部十餘營尙嫌單薄張曜赴陝剿賊甚爲奮勉見駐古
城相距較近著金順知照該提督移營西進藉爲後路策應其古
城一帶亦須有兵填紮並著金順知照宋慶卽率各營擇要扼堵

仍聯絡劉厚基等軍以壯聲威張曜宋慶等軍剋日進取需餉接濟著鄭敦謹速爲籌畫毋誤師行董志原賊匪既經北竄陝省西路情形較鬆而北路賊勢日肆蔓延左宗棠豈可膜視著卽派撥勁旅馳赴北路相機進剿以期早殄逆氛歸綏等處防務著定安懷遵疊次諭旨認真籌辦以杜窺伺將此由六百里各諭令知之○戊午諭軍機大臣等穆圖善奏陝回竄擾南路撤回駐狄各軍以保完善請飭金順兼顧山陝西北邊界並餉需爲難情形及出差官弁被地方官殺斃多命各摺片陝回竄逼秦州等處勢極披猖雖經善山保等奮力衝擊立解秦州之圍而糧運不繼譁潰堪虞穆圖善見飭駐紮狄道各軍移紮鞏昌並於甯遠伏羌二縣要隘分營扼守合勘南路股匪疏通運道尙係爲事勢所迫不得不斟酌緩急處以權宜所請交部議處之處著加恩寬免左宗棠聞

清水民團之變出示曉諭許以請帑賑撫禁革差徭固係爲恤民起見惟穆圖善處餉源窮乏之地力爲其難左宗棠總當恪遵疊次諭旨將各省解到餉銀均勻分撥不得以空言見好於民致甘省軍務辦理愈形棘手前已有旨令左宗棠馳至涇州接受總督關防見在甘省南路軍情緊急著卽懷遵前旨迅赴涇州接印任事覘賊所向認真勦辦毋稍延緩金順見已進規烏喇磴口未必卽能分兵花定甯夏一帶防務穆圖善當隨時與金順咨商相機布置穆圖善所派赴楚製辦軍裝之遊擊周欽輝等行至榆林被該處地方官殺戮殆盡穆圖善以該道所稟情節支離飭令切實根究一年有餘尙未稟覆顯有事前枉殺事後粉飾情形著劉典提集人證嚴訊確情務令水落石出毋稍瞻徇原摺著鈔給劉典閱看穆圖善另片奏拏辦潰勇情形並派員赴川募勇等語成祿

黃有才勇丁東潰雖經分別安插懲辦該營官未能妥爲防範咎有應得副將屈國香著卽行革職撤去管帶仍畱營效力贖罪儻再不知愧奮卽行從嚴參辦勇丁相率潰變此風萬不可長必須嚴加整頓以肅軍律著穆圖善嚴飭楊占鼇黃有才等各將其餘部眾妥爲鈴束毋令滋事效尤此起潰勇已抵涼州願入穆圖善軍營隨剿該署督仍當體察情形不可草率錄用至所稱甘勇多不得力而就地招募後患尤多擬派員赴川募勇六營赴甘助剿所籌尙是惟當嚴飭該員等揀選精壯訓練成軍俾知紀律沿途尤宜嚴加約束毋令滋擾地方將此由六百里各諭令知之○己未四川官軍克復貴州清平縣城賞道員唐炯提督劉鶴齡珍物提督陳希祥三代一品封典○庚申諭內閣表揚忠節係地方應辦之事著各直省督撫查明賊擾地方有臨危授命者隨時奏請

旌卹但不得稍涉冒濫○諭軍機大臣等李鴻章奏提督劉銘傳患病未痊懇請開缺已明降諭旨准其開缺調理矣惟該提督所部各營前經曾國藩奏明作爲畿輔護衛之師見在劉銘傳既經開缺劉盛藻接統是否勝任或須另派妥員接管並應否遣畱之處著曾國藩悉心察度隨時奏明辦理李鴻章原摺著鈔給閱看將此諭令知之尋奏遵查劉盛藻廉明精細將士翕服接統劉銘傳所部堪以勝任報聞○李宗燾以病免以劉齊銜爲河南布政使由浙江按察使遷○林之望以病免以崇保爲甘肅布政使由西甯道遷○辛酉諭內閣鄭敦謹奏請將出力之已革大員免其發遣等語已革山西按察使陳湜前因辦理河防未能堵禦以致逆匪竄越當經降旨革職並發往新疆效力嗣因鄭敦謹奏請暫畱山西辦理防務茲據該署撫奏稱陳湜自畱防一年有餘實心實力辦理俱

有成效請加恩免其發遣各等語陳湜著准其暫免發遣帶勇前赴左宗棠軍營戴罪立功以觀後效○諭軍機大臣等陳湜自抵山西後辦理河防增兵益餉朝廷無不立允乃於擒匪搶渡之日竟敢在省遷延其咎甚重迨褫職後辦理防務雖有微勞但並無戰績可稱足以自贖豈能遽行施恩惟該革員在軍營有年廢棄可惜著鄭敦謹卽飭陳湜統帶所部楚勇馳赴左宗棠軍營隨同剿賊儻能奮勉立功著有奇績卽由左宗棠奏請施恩至陳湜赴陝以後山西兵勇較少應如何布置李慶翱能否得力著鄭敦謹妥籌經理毋得稍有疏懈致負委任將此由四百里各諭令知之○以興奎爲浙江按察使由山西歸綏道遷○王戍諭軍機大臣等定安等奏截剿黃河兩岸竄匪情形並請飭張曜赴磴口剿賊各摺片磴口賊匪紛竄後套一帶黃河東西兩岸均有賊蹤肆擾經烏爾

圖那遜馬陞等在哈木爾和碩及薩拉素地方分投進剿斃賊多名餘匪向西南敗遁惟二圪旦灣富家補隆一帶尙有賊匪盤踞難保不乘隙東犯著定安飭令烏爾圖那遜等趕緊探蹤追剿迅殄逆氛所有此次出力官兵准其擇尤彙保毋許冒濫前因磴口情形緊急諭令金順由烏喇一帶進圖規復並令張曜一軍移營西進爲後路聲援定安此次所請令張曜前赴磴口進剿自係尙未接奉前旨著定安懍遵前旨卽飭張曜迅速拔營前進會同金順相機剿辦其宋慶一軍並著遵照前旨填紮古城以資扼堵張曜宋慶兩軍距左宗棠軍營較遠所有該二軍應行進止之處卽著定安就近調遣以期迅赴戎機金順見在行抵何處著卽調度情形與張曜一軍聯絡進剿力遏賊匪東竄毋任蔓延張曜宋慶兩軍應需糧餉仍著鄭敦謹速爲接濟俾利師行將此由六百里

各諭令知之○癸亥以慶陞爲內閣學士

由太常寺卿遷

○甲子

上詣

大高殿祈雨

○諭軍機大臣等文麟景廉奏關外軍務喫緊請

停撥援兵暨道員呈請回籍據情代奏各摺片前因福濟等奏布倫托海叛賊滋擾請調援兵當諭文麟等抽調兵勇迅速赴援嗣據麟興等奏哈密兵勇來往不易復諭福濟等咨明文麟將前調兵勇暫爲停撥茲據該大臣等奏稱所部各營除分撥防護及防守各城外兩路僅十餘營兵力已形單薄而哈密刻下軍務又屬緊急請停止撥兵等語所奏自係實情見在布倫托海地方賊勢稍鬆索倫人眾亦已踵至所有前調之哈密援兵著毋庸調往吐魯番等處回情及惠回堡花海子沙棗園子一帶防務仍著文麟景廉隨時偵探並督飭兵勇實力嚴防毋得稍涉疏懈調署鎮迪道黎獻著准其回籍守制惟鎮迪道係催運哈密後路糧務不可

接替無人著穆圖善於甘肅見任及候補人員中擇其才能勝任者卽行奏補毋庸拘泥成例致滋貽誤其出關催運事宜該署督卽飭新補之員前往接辦以便景廉帶兵進剿毋任逗留將此由五百里各諭令知之○予河南陣亡知縣李毓珍建祠○丁卯諭軍機大臣等岑毓英奏堵剿省東竄匪獲勝攻克洛紅甸等處一摺尋甸嵩明賊匪攻撲楊林官軍退守宜良北屯該逆旋撲大板橋各營分股授竄省東十里鋪等處疊經官軍堵剿俘馘千計省城糧路尙無阻滯惟該逆並未遠遁且恐與江右館之賊暗通消息亟應相機進剿斷賊聲援著岑毓英飭令楊國發等由邑市等處進兵節節掃蕩規復楊林該逆既踞楊林其尋甸老巢當有可乘之機劉嶽昭豈得株守曲靖一籌莫展著卽迅速進兵與省城官軍東西夾擊務將嵩尋兩城力圖克復迅掃逆氛其洛紅甸豆

溫鄉等處踞匪經禁標等攻克廣西師宗境內肅清剿辦尙屬奮勉仍著飭令迅掃餘匪以靖地方逆首馬暢汰雖經殲除謝洪尙無下落並著認真搜捕出力員弁兵勇准其查明存記彙案請獎此次楊林首先失營之都司楊桐千總胡興邦均著革職畱營效力贖罪儻再不知愧奮卽在軍前正法毋稍姑容副將何秀林督率無方咎無可辭著交部議處仍責令帶兵剿賊以觀後效岑毓英另片奏署提督馬如龍傷疾較重懇請給假等語馬如龍著賞假一箇月起緊調理毋庸問缺將此由六百里各諭令知之○己巳諭軍機大臣等瑞麟等奏剿辦高明等處客匪完竣見飭進剿長沙踞匪一摺廣東鶴山客民糾黨竄入高明縣境經總兵鄭紹忠先將高明客匪剿平移紮鶴山分別剿撫並經該督等派員將客眾按名酌給川貲分遣雷廉等府地方妥爲安插該客民自應

知感知懼不敢復出爲匪惟粵東土客宿隙未除難保不再構釁應如何設法辦理之處著瑞麟李福泰督飭道員齊世熙悉心經理務使日久相安永杜後患新安東莞等處土匪竄踞赤溪同知所屬之長沙地方該處環山臨海匪徒膽敢負嵎著該督等卽飭鄭紹忠親統兵勇相機進剿所有剿辦客匪出力各員并准俟長沙剿匪事竣彙案擇尤奏請獎勵將此由五百里各諭令知之○予廣東殉難知縣冒芬建祠○辛未諭曾國藩整頓長蘆鹽務○廣直隸成安縣學額一名安徽鳳陽八名涇縣四名順天大興江蘇婁湖北蒲圻陝西咸陽各一名○是月豁免山東東昌府屬各州縣衛同治六年前舊欠額賦

五月壬申朔以神靈顯應加山西孟縣晉卿趙武祠封號曰翊化○癸酉兩江總督馬新貽等奏長江水師續議事宜一江西議裁

之九江水師營擬改爲九江城守營並專設大孤山湖口縣彭澤縣蕭家嶺各陸汛酌畱守備一員把總三員外委額外各二員兵丁二百名議裁之鄱湖營擬改設康山瑞洪二陸汛酌畱把總外委各一員兵丁四十名一湖南議裁之洞庭水師營擬改爲龍陽城守營酌畱守備外委各一員把總二員兵丁一百六十名議裁之岳州水師營仍酌畱水師兵丁七十八名歸陸路城守營轄一湖北議裁之漢陽營水師千總應請無庸裁撤惟將新隄把總移紮黃陵磯酌畱兵丁十名議裁之荊州水師營酌畱守備一員兵丁九十二名下部議從之○甲戌 上詣 大高殿祈雨○諭內閣前據李鴻章奏遵查湖南布政使李榕參款大概情形當降旨將李榕暫行革職諭令李鴻章劉崐逐款確查茲據該督等查明具奏此案李榕被參各款或查無確據或事出有因惟任用優伶

翠喜數年始終受其蒙蔽經劉岷面諭驅逐始令出署又將業經
禁革之件任意批准並於屬員妄定陋規罰錢不報等案漫無覺
察其辦理米捐雖無偏斂人命情事而濫委官紳租捐畸重以致
不協輿情均屬咎有應得李榕著卽革職以示懲儆劉岷既查明
李榕任用優人卽應據實參奏乃僅令驅逐亦有不合劉岷著交
部議處至米捐一項借資民力自應加意體恤該督等已將各屬
省委各紳概行撤回暨捐有成數之各州縣委員飭令銷差俾免
煩擾其尙未辦竣各屬仍當體察情形飭令妥爲經理不許苛累
閩閩○允李鴻章奏採買洋銅以資鼓鑄○以王文韶爲湖南布
政使張建基爲湖北按察使由荆宜施道遷○丙子諭軍機大臣等穆圖
善奏陝回分股竄甘請仍飭金順回駐花定並回匪偏近中衛董
志原踞逆紛擾情形暨請將擅殺之總兵暫行革職各摺片據稱

花馬池地方突有大股馬步賊匪爬城經富勒琿等擊退董志原逆匪復竄至中衛縣屬之甯安堡上橋卡將殷家寨等處及河南馬灘攻破並分股渡河逼近城垣其平番縣屬之牛站連城一帶又有西甯撤回圍攻堡城省城附近亦有賊蹤請飭金順迅回花定保護甯靈等語陝回分竄甘境穆圖善所部各軍分布西南於北路勢難兼顧自係實情蘭州爲根本重地關繫尤重仍著該署督就見有兵勇妥籌防守定邊花馬池爲甘省要害之區固不可無得力兵勇扼賊匪紛竄之路第磴口界接晉疆金順前奏親統各營由達拉節勦而西以期先復磴口此時自未便撤回卽著該副都統懷遵疊次諭旨斟酌辦理張曜統師西進爲金順後路接應宋慶進紮古城榆林防守無人左宗棠等或卽於劉松山郭寶昌各軍中抽撥一軍填紮榆林以資鎮撫董志原逆股前據左宗

崇等奏稱竄回金積堡茲覽穆圖善所陳是該逆分三路奔竄倏東倏西迄無定所著左宗棠嚴飭各路將弁確探賊蹤迅圖剿辦不得以回氛距陝較遠置之不顧並著將賊情隨時知照穆圖善該大臣久無奏報刻下陝境有無賊匪該大臣駐紮何處陝甘北路如何嚴密布置及回逆由董志原分竄後應由何路撥兵跟蹤截剿均著隨時奏聞其甯靈已撫回眾仍著穆圖善飭令胡昌會率同馬朝清妥爲鈴束毋令滋生事端連城城圍既解西路撤回卽著嚴飭張萬美就近兼顧並飭黃金山將涼州南山游匪搜捕卽由涼州繞赴中衛堵擊北路竄匪以杜紛擾記名總兵陳懷仁臨陣規避並有剋扣勇餉等情本屬罪所難宥黃金山於查明後卽將該員正法尙無錯誤惟未稟請穆圖善批示亦有不合黃金山著暫行革職畱任以示薄懲該總兵平日打仗尙稱得力見當

軍營用人之際如果續有戰績仍可仰邀恩施將此由六百里各諭令知之○子甘肅傷亡副將曾天寶祭葬世職○庚辰諭軍機大臣等劉崐奏援軍克復施秉蕩平各寨進規黃平新州遇伏失利見在固守鎮施兩城再籌進取一摺楚軍既克施秉復乘勝掃蕩白洗各苗寨乃因黃飄險要黃潤昌等分隊進攻逆首包大肚糾集悍黨數萬先伏山谷待我軍入險突起阻截以致黃潤昌等血戰捐軀喪我良將披覽劉崐所奏各情曷勝悼惜見在席寶田等固守鎮施兩城雖大局尙無妨礙而逆賊彼猖至此敵愾同仇諒各營倍深忠憤卽著劉崐飭令席寶田激勵諸將力振軍威斷不可因一挫之後稍形頽喪必當設法規取將包大肚首夥各匪悉數掃蕩以快人心其各營更換病卒及陣亡缺額各勇並著劉崐飭令迅速募足以資進剿將此由六百里諭令知之○子貴州

陣亡按察使黃潤昌祭葬世職如巡撫例諡忠壯道員鄧子垣祭葬世職如布政使例諡壯毅提督劉長槐祭葬世職加等諡果壯均於死事地方暨原籍建祠知府羅萱等十九員祭葬世職加等○辛巳諭內閣見在部庫款項支絀除應放正項並緊要工程照常支放外其餘各項工程及一切雜款均暫援發給○以庫款支絀停止各省籌銅解錢○壬午諭軍機大臣等岑毓英奏賊匪襲踞澂江府城一摺澂江回匪上年業經投誠乃復勾結嵩尋逆匪由楊林繞越山路襲踞府城見在附省賊壘既未攻拔尋甸之賊又分竄長坡小偏橋等處館驛淩兮竹園各回寨復與澂江相聯勢必勾合上竄省城愈形喫重岑毓英雖已令馬忠等扼守歸化等處但恐兵力單弱難資捍禦著該撫迅卽督飭將士先將小偏橋等處股匪剋期掃蕩再行酌量情形分兵援剿尋甸踞匪既經

傾巢竄出曲靖防務較鬆著劉嶽昭移緩就急卽行帶兵進紮宜良遙爲省城聲援俾糧道不至梗阻毋得株守一隅遷延不進致誤大局唐友耕所部川軍已抵大關著劉嶽昭岑毓英催令星速進行由東川一帶相機援剿毋稍延緩將此由六百里各諭令知之○以同逆陷澂江府城岑毓英下部議處予陣亡遊擊崔萬象等祭葬世職○甲申諭軍機大臣等定安等奏官兵截剿河西股匪大獲勝仗並防該匪東竄各摺片回匪竄踞磴口分作兩股一乘船東下見泊纏金河口一竄近阿拉善旗烏蘭木頭另股於四月初間竄入杭錦旗屬經定安等派兵會同蒙兵截剿該逆拌命抵敵官兵從後鈔襲賊勢不支一齊敗退追殺五六十里擒斬甚多著定安等仍咨會杜嘎爾分飭達爾濟扎那格爾第等督率所部隨時防剿務將蕭海兩逆設法兜擒杭錦敗匪殄除淨盡其纏

金河口水路回匪與竄近烏蘭木頭陸路回匪勢甚猖獗並著定安等迅飭成山烏爾圖那遜分途進剿以防東竄磴口路通晉疆若該匪自纏金東下黃河兩岸綿長數百里防不勝防前諭金順由達拉節勒而西張曜爲金順後路接應著該署將軍卽率同張曜趕緊拔隊由西山背進兵沿河截剿一面迅將磴口攻復毋任該匪東擾張曜帶勇前進古城一帶空虛著金順仍遵前旨知照宋慶迅赴古城並相度情形與張曜暨達爾濟扎那格爾第各營聯絡聲勢以壯軍威金順行抵何處見在剿辦情形若何前奏渡河徑赴達拉進剿達拉是否卽達拉或旗該處距纏金磴口遠近如何一面迅速具奏鄭敦謹亦當飛飭防河員弁嚴密戒備杜賊伺隙竄擾左宗棠何以日久未有奏報該逆歸併金積堡後分踞磴口應如何撥兵截剿免賊東竄又金順張曜宋慶陸續前進花

靖一帶是否有兵扼紮榆林劉厚基兵勇是否足敷分布何以均未籌及著該大臣等統籌全局嚴飭各路將弁迅圖剿辦並確探賊情隨時馳奏將此由六百里各諭令知之○乙酉貴州巡撫曾璧光奏提督張文德進規八寨獲勝得旨著曾璧光咨商張文德統帶所部聯絡川楚各軍節節掃蕩迅將八寨攻克毋稍延緩○丙戌 上詣 大高殿祈雨○諭內閣蘇鳳文奏遵查藩司未能勝任據實覆奏等語藩司事務繁多責任綦重茲既據該撫奏稱江忠潛人尙明白惟才具未優精神亦難周到不能措置裕如廣西布政使江忠潛著開缺來京另候簡用○廣西巡撫蘇鳳文奏軍務未竣請緩陛見得旨著俟太平稍鬆卽行來見惟該撫前既奉有來京陛見之旨見雖軍務喫緊亦應請旨遵行乃擅自奏緩殊屬非是著傳旨申飭○丁亥以康國器爲廣西布政使潘蔚爲

福建按察使

由山東鹽運使遷

○己丑諭軍機大臣等景廉奏密陳關外

軍務情形一摺所稱回酋索煥漳遣人乞撫多不可恃各情朝廷早已籌及業經諭知文麟等妥慎辦理仍著文麟景廉懷遵前旨會同成祿悉心籌辦萬不可將就目前墮其奸計關外情形孔棘文麟景廉所部止數千人成祿見究行抵何處著卽剋期出關與文麟等聯絡聲勢相機剿辦如再藉詞遷延是該提督自干罪戾景廉亦當迅赴哈密會商防務不得任意逗畱至所稱肅州見已收復能否將甘涼肅三屬應解肅軍之糧移作出關兵食或提用正糧或設法捐辦多派車駝運送並於西安玉門兩城內酌設糧臺派員轉運各節著左宗棠穆圖善彼此熟商應如何源源接濟俾關外諸軍弗形困乏之處卽行妥籌具奏前有旨令左宗棠前赴涇州接受督篆久未接該大臣奏報諒已部署起程刻下陝省

軍務已鬆卽著遵奉前諭率旅西行將甘事妥籌辦理以靖邊陲將此由六百里各諭令知之○辛卯諭軍機大臣等有人奏四川總督吳棠荒謬貪污物議沸騰等語據稱吳棠眷屬抵川時需用夫輜甚多到任後收受屬員規禮不下十餘萬金其餘賣缺賣差甚至索及夷人並因需索不遂將提督胡中和駐防一軍撤散而以所帶副將張祖雲另募之勇爲邊防名爲節省實則過之用以調劑私人又數月以來雲南巡撫岑毓英差官入川計七八次每次必有餽遺爲數甚鉅貪謬情形不一而足案關大員婪贓並邊防要務亟應徹底根究著李鴻章馳驛前往川省按照原參各款秉公確查據實具奏該督與吳棠雖係同鄉不准稍有徇隱原片著摘鈔閱看將此由四百里密諭知之○諭定安等奏截剿竄匪獲勝並布置張曜等軍各摺片回逆由石背子地方分股竄擾一

由陸路攻撲烏蘭木頭經參領德昌等擊敗竄向西南烏爾圖那遜跟蹤追剿斃賊多名餘匪由上中灘渡河竄入杭錦旗仍由石背子竄回邊內其水路賊匪擾至纏金河口亦經參領成山等擊沈賊船多隻匪眾捨舟登岸竄入鄂爾多斯旗境烏爾圖那遜所部已紮烏蘭木頭地方後套纏金一帶見無賊蹤仍著定安等飭令達爾濟等探蹤進剿務絕根株毋令再行紛竄磴口地方緊要卽著定安等會商金順派員駐紮以資鎮撫該處醜類多係董志原散匪左宗棠劉典亦當撥隊接剿不得以驅逐出境爲了事也至靈州一帶均有大股回匪盤踞左宗棠自應督兵節節進剿尤當防其鉅走方可聚而殲旃定安等已調宋慶後隊移紮皇甫川截賊東竄而令張曜酌帶數營前往纏金磴口其餘隊伍仍駐古城等處杜賊北竄之路布置尙爲周妥儻有賊股竄近卽著分投

堵剿力遏狂氛仍隨時飭令該員等和衷共濟以期聲勢聯絡陝甘邊境多與晉疆毗連鄭敦謹當會同定安隨時防範毋令匪蹤闖入將此由六百里各諭令知之○諭劉嶽昭奏進攻尋甸賊巢並分兵宜良援救普安各情形一摺前據岑毓英奏尋甸踞匪傾巢竄出澂江復被賊踞省城情形喫重當經諭令劉嶽昭進紮宜良遙爲省城聲援茲據奏稱該督所部各軍進規尋甸勢難撤回已派柳明德一軍拔赴宜良並調全祖凱帶兵繼進著劉嶽昭岑毓英飭令該員等實力堵擊毋任澂江之賊再行東竄以保省城糧路尋甸踞匪大股既經出竄該處見在究竟有無賊匪劉嶽昭所派各軍分紮馬龍王家莊等處何以尙未進兵攻拔該督所部各軍一隅株守日久無功實屬不知振作著卽督飭各營奮勉進剿迅掃逆氛並著催令川軍剋期前進援應省垣小偏橋等處賊

巢著岑毓英懷遵前旨迅速進攻力圖埽蕩該督撫等均受朝廷
厚恩總當以國事爲重和衷商榷共濟時艱不得各懷成見致誤
大局新城大股賊匪圍逼普安廳城劉嶽昭已派劉官禮等帶兵
馳援著曾璧光迅卽派兵前往與滇軍會合夾擊迅解城圍劉嶽
昭見在暫駐曲靖著卽酌度情形何路喫緊卽行親往何路督剿
不可坐失事機將此由六百里各諭令知之○諭見在雲南軍務
緊要省城圍尙未解劉嶽昭一軍亟須由尋甸等處進攻以資援
救惟該督所部楚軍向由川省接濟餉需若不敷支應難保無停
兵待餉之虞著吳棠將劉嶽昭所部楚軍及果後軍月餉竭力籌
措源源報解其從前所欠餉銀著一併按月搭解協濟滇省卽以
保衛蜀境毋得稍有遲誤將此由五百里諭令知之○諭岑毓英
自簡任雲南巡撫後觀其疊次奏報似於滇省軍務尙知認真辦

理惟省城圍尚未解。潞江近又失守。睽懷南服。焦念實深。茲聞上
次楊林被陷。百姓死者數千。練頭李廷標。何秀林。敗回省城。該撫
不責其罪。反各賞以四百金。以致人心不服。士卒離畔。此次潞江
之變。亦因邵天貴帶練騷擾。同民銜恨。勾通逆酋馬周襲踞郡城。
至省城賊踞。該撫督隊攻擊。則兵刃齊奮。易以他將。則槍礮皆空。
且有練頭通賊。毀礮分賞。隨毀隨起。情事又聞。該撫勒派民捐。至
再至。三紳士從中漁利。任意把持。上下交征。百姓咨怨。雲南兵連
禍結。歷有年所。練勇勦賊。原以輔兵力之不足。惟必須嚴明賞罰。
方能令出。惟行不得。任用桀驁之徒。貽誤大局。至滇餉孔亟。疊經
諭令協餉。各省趕緊如數籌解。岑毓英惟當撙節動用。不得苛斂
民間。致失人心。而騰謗。謹經此次訓飭。後該撫務當力圖振作。有
則改之。無則加勉。以期滇事日有轉機。不負委任。如辦理一無成

效惟事粉飾彌縫則朝廷賞功罰罪自有權衡毋謂萬里外不能洞鑒也懷之愼之將此由五百里諭令知之○以雲南鶴麗鎮總兵官馬如龍爲雲南提督○移江西上饒縣縣丞於銅塘山廣豐縣縣丞於大東阮改爲分防縣丞○甲午諭軍機大臣等吳坤修奏皖省霍邱縣境向稱匪藪該處與河南固始接壤近有積匪在交界處所潛藏時出滋事亟須掩捕等語匪徒嘯聚滋擾地方必當早絕根株免畱後患吳坤修見已派令張得勝相機搜捕惟皖豫兩省邊界毗連難免此擎彼竄巡查奸宄本係地方官專責著李鶴年英翰嚴飭所屬會同協緝務將該匪窩巢黨與嚴密搜拏盡數殲除毋令一名漏網英翰未到任以前吳坤修仍應隨時認真整頓不得稍涉疏懈將此諭知李鶴年英翰並傳諭吳坤修知之○乙未直隸總督曾國藩奏籌議練軍事宜請參用練勇之法

一文法宜簡一事權宜專一情意宜洽每哨仍以十人爲隊並另立馬隊營不令雜於步隊之內仍由部添撥月餉二萬兩下部議從之○丙申左宗棠奏董志原回巢埽平綏德宜君叛軍同時綏定後陝西北路降人董幅祥李雙良張萬會扈良儒梁植劉文誥劉永春等股眾經署綏德州知州陳瑞芝會同劉松山委員提督黃萬友等安插於瓦窯堡老君殿周家窰等處耕墾荒地均就安帖惟綏德延安交界各縣時有游匪潰卒土匪暗相勾結假息山谷閒肆行劫掠其近延長延川宜川者記名提督安徽壽春鎮總兵郭寶昌記名提督劉聲集疊次派隊擒斬各數百名其近洛川者副將劉竹田時出隊截捕多所斬馘其叛軍畏誅漏逸及變易姓名潛迹營中者又經劉松山記名提督周紹濂先後接緝正法於是北山地北縱橫數百里閒漸有甯宇而鄜州甘泉西北一帶

游匪數十數百飄忽出沒動輒數十百里莫測其栖泊之所臣於
董志原回巢埽平後檄畱陝道員魏光燾提督劉端冕兩軍由黑
水寨王家角進太白鎮合水縣一帶以漸向慶陽正運糧待發間
忽捕獲蓄髮悍賊張有幅等五名訊供爲首老賊卽上年盤踞雲
巖鎮巨逆袁大魁自上年六月雲巖老巢經官軍攻破後袁大魁
乘雨夜竄逸隨身死黨數十人七月內竄至宜川縣燕曲堡招集
敗黨及甘肅飢民潰卒約共數百人復經官軍擊敗袁大魁仍偕
其死黨竄出冬間逃至保安縣屬之老巖窰其地絕險有居民百
餘戶憑險結寨自保回土各匪頻年攻之未破袁大魁僞爲官軍
羅糧者給寨民遂入據之糾集游匪潰卒約數百偪脅鄰寨土民
千餘皆蓄髮從賊分爲五隊每隊一僞將軍一指揮統之職官軍
進止爲趨避候忽狎至官軍不能得其蹤迹也魏光燾既訊畢斬

張有幅而釋其餘黨令爲前導一面會商提督劉端冕副將張星元刑部主事周瑞松各派所部助剿期速滅事庶移營前進可免後顧之憂四月初五日潛師夜起黎明抵老巖寨前面三十里馬蹏溝守卡賊驚起抗拒副將王正和蕭玉元遊擊李奪魁參將魏紀登奮威衝殺立斬執旗賊目數名奪隘而入適總兵于奇泮副將石茂林總兵周振南參將譚吉士左右截出將馬蹏溝之賊登時擒斬殆盡其踞頭道川之賊聞風驚卻官軍合勢蹙之窮追二十里斃賊約共四百餘名奪騾馬百餘頭生擒僞將軍徐榮韓清榮僞指揮張洪太余天貴等訊畢斬之時已薄暮大雨如注始令收隊初六日黎明劉端冕所部提督甘大有副將喻經魁率師抵陳家紙坊遇賊百餘殲之進偪鷓子川守卡賊分布拒守槍子如雨參將章和榮顏禧承等斬關而入賊大譁潰官軍分投截擊生

擒僞指揮張復盛何文彪等逆訊明斬於陣前士氣倍奮當將鶴
子川之賊數百一併擒斬初七日駐守延安之副將賀卓吾幫統
之副將張星元又率所部馳來魏光燾會集諸營分路直逼老巖
窰方擬兵力厚集乘勝而前縱賊巢天險亦無難一攻卽下也派
州判方大猷督前後營及前營馬隊攻老巖窰之前自率中營奇
營及中營馬隊繞出老巖窰之後各營築壘環攻竟日將士屢前
屢卻苦於無力可施收隊後審視賊巢見老巖壁立千仞下臨洛
水窰孤懸巖中左右立木爲柵兩旁皆深塹小橋橫架僅通人行
爲賊出入之路賊早將巨繩曳橋令起路已斷矣窰前石磴螺旋
近洛處水樓兀立賊踞其上層開槍眼是爲窰之外郭議先將水
樓攻毀以漸近窰外初九日令賀卓吾張星元率所部攻水樓之
賊而白平各營從窰外兩旁夾擊力攻竟日外窰雖破斃賊不過

數十名而壯士之傷亡者已十餘名參將袁海壽手受槍子傷窩內礮石紛下帶傷者益眾俯視水樓已經著火旋被賊撲熄收隊而回諸軍均擬速平賊巢以便及時前進舉辦屯墾諸務見賊踞巖穴極險無路可攻欲罷不能欲速不可慚憤交迸連日會商巖旁巖下均無可著手非從巖頂鑿石立柱潛縋壯士引繩而下無由得抵洞門也魏光燾急雇石工而挑勇丁之習此藝者助之一面會各營逐日更番撲卡多積蒿草枯柴僞爲火攻之狀疑之十五日巖上石路成穴石多安橫柱下令軍中能從巖縋下撲洞門者受上賞自十五日起派隊輪攻槍礮晝夜不絕時放噴筒火箭令賊防範不得休息五鼓撤隊十七日方鳴金收隊味爽壯士十餘由巖巔抱皮繩縋至柵外賊猶酣臥少頃垂下者益多拔柵闖入連拋火彈袁大魁急喉悍黨迎拒窩內人聲沸起官軍短兵撞

刺賊屍枕藉袁大魁經官軍以傷倒地賊弟袁二亦刃傷未殊時都督徐國榮守備楊振家陳如美千總范潮海董大榮蔣得勝戴鵬程外委張經明徐有禮軍功李鴻泰周元吉劉開年陳萬得一齊殺人割取袁大魁袁二首級大呼以徇各軍競奮立將上下卡水樓一併攻拔老巖十五窠之賊除斬馘外紛紛墜巖墮水以死無一脫者官軍將洞窠一律剷除免爲山寇竊踞乃次第拔營前進函袁大魁首級馳送大營驗明徧傳被害各地方示眾而鄜延巨患以平周瑞松旣會克老巖窠賊巢收隊回延安詢知府城南三十里野豬窪等處時有游勇出沒商旅苦之而未悉其巢穴所在正擬派隊搜捕聞二十四日捕獲游勇朱俊林訊知匪目杜占元自上年獵月旬結土匪連被英溝龍耳溝魯家灣等寨卽踞魯家屯收畱游勇哥老會匪分布韓家原紙坊村孫家溝不時遠出

數十里百餘里外肆行劫殺所得贓物輒以少許分給近寨民人故伏匿雖久迄無舉發者二十六日黎明周瑞松率所部抵魯家屯察看寨踞山巔小徑已經掘斷兵不能入乃令副將賀卓吾帶同武舉彭春亭及親兵二名持諭叩寨託言買糧杜占元不疑放板橋納之賀卓吾過橋以親兵守護橋頭急放號礮周瑞松麾軍奪隘而入武舉彭春亭手縛杜占元霎時隊伍齊至接殺游匪殆盡墜巖死者二十餘人同時副將張維美參將彭芝蘭亦將紙坊村盤龍寨韓家原各處游匪一律搜捕並獲土匪劉大幅斬之周瑞松將所獲牲畜資糧散給貧民親訊匪目杜占元張光如李鳳先張兆霖吳東元張世顯楊林元朱洪勝等均積年哥老會匪一併斬決而郭寶昌前次勦散狗頭山賊後賊目張大仁卽張三胖子復勾結游勇土匪於延長縣東南八十餘里界連宜川之小海

村南莊羊肚原等處時出剽掠四月十四日擾及城東七十里之
白家河知縣孫永成偵悉賊蹤商請郭寶昌所部記名提督宋朝
如副將李長勝分路前往圍捕甫抵玉家河遇掠食之賊二百餘
名官軍奮擊斃賊多名生擒李根兒等十餘名白家河之賊卽解
圍潛遁宋朝如收隊後賊仍折回攻撲白河十七夜宋朝如孫永
成復督兵圍擊之斃賊百餘名賊敗歸巢十八夜官軍襲破馮家
嶺南莊羊肚原諸巢陣斬匪目呂邦科斃賊數百名生擒王守正
李金賢等四十餘名分別斬釋惟張大仁由深淵遁去二十八日
竄至鄆州東北牛武鎮僅殘匪百餘名駐鄆官軍急起遮截擒斬
二十餘名餘皆散逸無蹤總計榆林綏德延安鄆州各府州所屬
游匪潰卒土匪巢穴剗削一空數郡殘黎得安耕作臣軍得以一
意西征免虞牽掣以局勢言之雖較之前此度隴諸軍獲效稍遲

將來蒞事或速未可知也延綏之間安撫漸有成局北路劉松山一軍由西北進指定邊花馬池一帶以截甯靈之賊令不得東中路魏光燾劉端冕周紹濂諸軍西出合水正甯甯州以向環慶雷正綰黃鼎諸軍由董志原涇州趙鎮原固原崇信華亭以蔽汧隴而規平涼南路李耀南吳士邁諸軍由隴州寶雞趨秦州臣率親兵及正營良營由永壽邠州長武以赴涇州飭馬德順簡敬臨馬步各軍暫駐上良百里鎮以策應南北兩路且耕且戰安民以除土匪整軍以戢潰卒撫良回以勦逆回不敢以小謀近功誤國家安邊至計也 上諭內閣陝西官軍自埽平董志原回巢後各路匪徒仍復暗相勾結肆行劫掠經提督郭寶昌劉松山等派兵接捕斬獲甚多雲巖鎮巨逆袁大魁竄至保安縣屬之老巖窯憑險結寨經道員魏光燾提督劉端冕等率兵攻勦殲斃逆首袁大魁

及賊目多名餘匪悉數埽除各處匪類亦經官兵搜捕淨盡榆綏延鄜各屬一律肅清勦辦尙爲得手惟陝西頻年疊遭兵燹此時逆匪雖經勦淨而游勇土匪仍恐易滋嘯聚且各屬地方賑撫窮黎安插人眾在在均關緊要左宗棠見在振旅西征所有陝省善後各事宜劉典責無旁貸卽著悉心籌畫妥爲經理以期無負委任○左宗棠奏甘肅慶陽涇州一帶地當秦隴之衝頻年回逆竄擾人民流亡殆盡野城荒廢千里蕭條董志原回巢蕩平後敗殘之賊北竄官軍躡追經過慶陽及所屬之安化合水甯州以及涇屬崇信鎮原六城惟崇信尙有居民餘皆空城人煙斷絕比卽分撥官軍漸次移營進駐一面遴訪甘肅人員署理府縣各篆招輯流亡計口散糧以延喘息並給籽種農器督勸丁壯及時耕種以規久遠擇險隘爲兵屯統領營官主之就堡寨爲民屯府州縣主

之均因其地之所宜按節候播種粟藁蕎麥諸種督課軍民日事鋤墾耕牛不能多得則以古昔區田代田之法示之冀獲有秋重謀生聚難民來歸者漸多則賑糧亦漸增墾地漸廣則籽種亦漸費凡所規畫俱是草創止能隨宜部署不能豫立規模豫計經費各守令以熟悉風土稍知稼穡艱難能恤民隱能其作苦者爲上選幹吏尙非所急也慶陽府一缺轄境寬闊董志原迤東一路皆其屬地查有前甘肅環縣知縣藍翎運同銜升用直隸州知州翁健康慈篤實久著循聲堪以委署慶陽府篆城內衙署倉庫廩舍蕩然無存先於正甯甯州合水附近郡城處所駐紮巡行一俟難民漸歸故土乃能入城治事安化縣一缺查有運同銜甘肅卽補知縣丁珮璐人尙耐苦堪以委署甯州一缺查有同知銜分省補用知縣黨鎮實心愛民堪以委署鎮原縣一缺查有候選知縣廖

溥明樸實明幹堪以委署崇信縣篆查有畱陝候補知縣李世瑛勤樸耐勞尙無習氣堪以委署諸城皆收自灰燼之餘從新締造與草昧經營無異若循例檄司遴委誠恐不盡得人且荒苦之區雖委署有人而捧檄經年不能赴任者比比而是親民之官豈宜久曠勢不能不破除文法就近遴委且薄給盤費薪水以資辦公免其枵腹從事庶可冀其安心求治宣布朝廷德意拯此殘黎區區之愚並懇飭下吏部陝甘兩省委署府廳州縣各缺暫准督撫臣遴才委用勿拘以例法庶於時局不無小補 上諭甘肅慶陽一帶地方甫經收復辦理賑墾撫輯事宜均關緊要該督遴才委任自係爲地擇人所有慶陽府知府各缺著准其以升用直隸州知州翁健等署理嗣後陝甘兩省委署各缺著該督撫等斟酌情形變通辦理總期有益地方毋得濫行委用儻該員等於地方事

務未能措置裕如著卽隨時撤參毋稍遷就○左宗棠奏

臣因餉

事短絀屢次具摺馳陳前蒙 天恩諭各省除每年原協

臣軍餉

銀三百三十萬兩署督

臣

穆圖善軍餉銀一百二十萬兩署撫

臣

劉典軍餉銀六十萬兩又添撥釐金三百萬兩總計八百一十萬

兩欽仰我 皇上軫念西陲民隱兵艱悉廩 聖慮各省如果遵

旨分起撥解則截長補短挹彼注茲

臣

自可一意馳驅勉圖報稱

更何敢再三嘵瀆自取咎尤乃緘牘頻催並經辦理西征糧臺翰

林學士袁保恆再三商懇自同治八年正月起截至四月底止計

各省協餉共應解銀二百三十萬兩除穆圖善委員提解不計外

其解到西征糧臺及起解在途者各省就近對撥者止七十餘萬

兩是各省撥解之數不及奉旨協撥三分之一而舊欠協餉洋稅

尤勿論也

臣

與劉典楚軍積欠已多無計彌補所藉以支持至今

尚未譁潰者於餉銀解到時先儘購運糧食草料軍裝軍火軍械之需每月每營僅給鹽菜柴薪銀六七百兩俾勇丁長夫聊資餬口至疾病之藥餌傷亡之卹養與夫統領營哨官弁之薪水辦公銀兩槩停不發以故將領雖極窘乏士卒尙免飢疲自董志原蕩平後官軍以次移營前進就近墾荒布種日事田疇招輯流亡計口放賑製備農器分購籽種及時誕降以業遺黎移粟移民以實曠土所需經費無款可指不得不於正餉內通融挹注將士知軍民均以謀食爲急怨讎不生五月節前各軍雖僅求一月足餉迄不可得歎息而返而臣前擬遣赴秦州一路官軍則因急籌一月足餉裹帶啟行以便隨地購糧尙未能湊發足數其他可知此餉事艱難兵事因而遲鈍之明驗蓋秦隴用兵籌糧艱於籌餉籌轉運又艱於籌糧古今不易之局而採糧轉運兩者尤非實餉到手

無從籌辦雖有良將不能點鐵而成金雖有神兵不能煮砂以當粥迨軍士因飢致潰伍籍空存接括民糧以爲食而民亡雖募游手以充兵而兵廢卒至戰不能戰守不能守楊岳斌之急赴隴西趣戰而潰穆圖善之急保蘭垣竭蹶而危足爲前鑒事後思之勞師數載爲時不爲不久每年費過百萬所耗不爲不多其於秦隴大局非惟無益也臣奉命出師豈敢逗留不進然不豫將後路稍爲布置餉道槩于疏通而貿然前行再蹈覆轍其必貽朝廷異日之憂也決矣臣自量才智技能與閱事之久無以加於楊岳斌穆圖善且楊岳斌穆圖善專顧隴疆臣則司分解而統收事勢固有不同也甘肅欠餉之勇以百數十營計穆圖善既知其不足用矣不卽裁併復奏調馬隊二千奏請募蜀勇三千實則數已盈萬餉不能增營不能減復又增營以耗餉臣到涇接受督篆兵餉兼籌

豈能置之不理如以空言塞責違旨之罪將無所逃欲得實餉支銷又將安出各省協餉自本年正月至四月已欠解一百四十餘萬兩此後師行愈遠得餉愈艱索餉者又將紛至沓來憑何答付各省見撥餉之數疑朝廷之厚於陝甘甘肅見撥餉之數疑朝廷之偏厚於陝而孰將實解協款暗增出款一爲檢校乎伏懇 天恩飭下各督撫臣各就所轄地方廣爲設措於遵旨協撥西征陝甘各款儘釐稅一項實力湊解如釐項無餘卽暫移他款補足先其所急務期按月如數解到西征糧臺不得再有短缺俾得豫爲布置速赴戎機大局幸甚又奏陝甘餉事窘迫萬狀勢難支持各督撫臣奉諭協撥豈有坐視西事艱危不急思援手之理而所以頻催罔應者亦有由焉一曰旣協濟陝甘兵勇可不協濟陝甘餉銀也以薄餉給勇丁令赴他省之援其於本地可省安集之勞其

於他省可居援剿之名朝廷視之無畛域之見也將領德之無廢棄之嫌也一舉數善何樂不爲上年安徽增軍赴河南河南撫

臣

非之曾以語

臣

並舉以入告矣見在張曜宋慶所部則又河南撫

臣代募西征之軍人數多而餉不足又資山西協之以餉山西既

允協張宋之餉不能復餉陝甘也是陝甘未得豫軍之助先失河南山西之協餉也安徽之援秦者初僅郭寶昌之軍馬步三千人耳去冬復加募四千人交郭寶昌帶來則七千人矣人數多而餉不足臣不得不分陝甘之餉代爲買糧辦轉運是陝甘不能得安徽之餉且須分餉協安徽之軍也山東藩司潘鼎新奉旨赴陝甘所部人數卻已減至四千月餉尙需二萬數千兩潘鼎新乞假三月一面求山東兩江之餉而此四千人者則已每月虛糜二萬數千兩山東兩江如允餉潘鼎新之軍則必減應協陝甘之餉也見

復奉旨令陳湜帶所部西來立功贖罪陳湜所部合九千餘人此項月餉亦在六萬兩內外若取之陝甘陝甘何從覓此鉅款若取之山西山西既須籌陳湜之餉轉瞬冬防又須另籌防河之軍防河之籌恐亦力有所未逮陝甘懇催該各省各省得以有詞該各省名爲協撥陝甘陝甘並無實濟此陝甘餉事之窮也臣愚竊謂用東南之財賦贍西北之甲兵本古今不易之局若責西北以兵事而復責之籌餉責東南以餉事而復責之籌兵則兩勞而兩失之卽以時局言之陝西兵力先勦捻後討回先徂秦後度隴雖拮据不遑實未嘗多藉客軍之助臣亦未敢藉口兵力單薄求助各省陝甘所急者餉爲陝謀者宜先集餉不在增兵各省之兵增則陝甘之餉絀蓋各省既以兵助陝甘必不肯再以餉資陝甘也竊謂各省之軍已來陝者如張曜宋慶郭寶昌三大支本是勁旅然

約略計之每月已需餉十萬兩上下如令河南仍照舊供宋張兩軍之餉另加以購糧轉運之費飭宋張於見存馬步營數內挑汰歸併或萬人或七八千人則餉愈足而軍愈精可收飽騰實效張曜宋慶必能放膽前進所向有功河南雖不再協陝甘陝甘亦受其實惠而山西又可騰出月餉張宋之二萬兩以協陝甘不致再有拖欠亦兩得之道也安徽照舊供郭寶昌之軍令郭寶昌撤減營數共畱馬步四五千仍畱七千人月餉爲該軍購糧轉運之費郭寶昌必能放膽前進所向有功臣不必兼顧其採糧轉運之需併可得安徽月餉二萬兩實濟而安徽仍無所損其尙未到陝之潘鼎新一軍陳湜一軍每月亦需餉八萬餘兩如停撤潘鼎新之軍而令山東兩江以應給潘鼎新之每月二萬數千兩加協陝甘則陝甘可增山東兩江月餉二萬數千兩實餉而山東兩江仍無

所損如停止陳湜一軍陷防山西應撤遣者仍令撤遣則山西河防仍資熟手無須另籌防河之軍防河之餉並可得裁兵就餉之益而陝甘餉事亦無所損儻亦計之最便者歟一曰各省協餉厚於淮軍薄於楚軍也曾國藩率鄉人討賊名其軍曰湘軍臣自咸豐十年由湖南奉詔襄辦曾國藩軍務所部將士多沅湘澧資之產名其軍曰楚軍李鴻章自皖赴上海權蘇撫篆名其軍曰淮軍三軍營制大略相同而餉事則豐嗇頓異蓋所處之腴瘠固不同也上年剿捻事畢楚軍西行所指爲餉軍之資者洋稅淮軍東下所指爲撤軍之資者釐金然楚軍所得不及淮軍三之一也曾國藩奏借浙江釐金十萬兩爲撤軍之資而浙江於一月內已解三十萬兩其應解陝甘及臣軍之餉月共七萬兩嗣奉旨加協又五萬兩浙江乃先將舊協臣軍之二萬兩一項停止不解查浙江此

項協餉卽前由浙赴閩粵奏協臣軍之每月十四萬兩一款臣

由粵東凱旋時奏請一併停解而每月以五萬兩協陝甘嗣臣由

閩浙調督陝甘復奏提浙江應餉馬德順餉一萬輪船經費一萬

共二萬兩合成七萬兩較原提每月十四萬兩之數僅及其半見

在浙江卽遵旨於應解七萬兩外加協五萬兩亦祇每月十二萬

兩尙非浙江所難浙江一省經入經出各款均臣從前於全省肅

清時所定規模大致猶能記憶較之江南雖不足較之江西福建

則有餘撫臣如肯實心籌解一如劉坤一英桂之無分畛域則除

已裁釐金外協撥並非無款陝甘不止受其口惠也江南除照舊

應解劉松山六萬兩外僅協臣二萬兩劉典一萬兩穆圖善一萬

兩共止十萬兩而其協淮軍則每月二十萬兩多寡懸殊以餉事

言之楚軍籌措之難甚於淮軍楚軍需用之繁且急甚於淮軍奚

膏十倍而浙江江南所以應楚軍淮軍有多寡緩急反是非臣所望於浙江江南亦大違朝廷以兵事責西北以餉事責東南之旨矣李鴻章上年陛見時與臣晤語亟以陝西餉事爲憂而自任代爲籌措臣深感之此時陝甘餉事迫矣若李鴻章肯以緩急多寬之說告浙江江南請其以大局爲念無分楚軍淮軍裒多益寡移緩就急則江浙不徒託空言陝甘可速叨其實濟固臣所深願亦未嘗非李鴻章之初心也凡此皆應協陝甘之各省有款未解者臣恐尙未深探其底蘊可否仰懇 天恩飭下部臣詳加察閱分別催提以拯危疆之處出自 聖裁至西北餉源素絀本無可開之源然古今才臣籌餉贍軍每多取資鹽務就陝甘而論陝食河東之鹽甘食花馬池鹽池之鹽各有引地頻年回捻土匪肆擾陝甘徧遭蹂躪花馬池鹽池之鹽因路梗不能暢行每鹽一斤須

營十倍而浙江江南所以應楚軍淮軍有多寡緩急反是非臣所
望於浙江江南亦大違朝廷以兵事責西北以餉事責東南之旨
矣李鴻章上年陛見時與臣晤語亟以陝西餉事爲憂而自任代
爲籌措臣深感之此時陝甘餉事迫矣若李鴻章肯以緩急多寡
之說告浙江江南請其以大局爲念無分楚軍淮軍裒多益寡移
緩就急則江浙不徒託空言陝甘可速叨其實濟固臣所深願亦
未嘗非李鴻章之初心也凡此皆應協陝甘之各省有款未解者
部臣恐尙未深探其底蘊可否仰懇天恩飭下部臣詳加察閱
分別催提以拯危疆之處出自聖裁至西北餉源素絀本無可
開之源然古今才臣籌餉贍軍每多取資鹽務就陝甘而論陝食
河東之鹽甘食花馬池鹽池之鹽各有引地頻年回捻土匪肆擾
陝甘徧遭蹂躪花馬池鹽池之鹽因路梗不能暢行每鹽一斤須

價百數十文甘之殘黎時苦淡食臣擬俟北路之兵進至花定卽

當妥爲辦理其河東之鹽雖頗暢銷鹽價仍形昂貴西安市價每

鹽一斤須錢七十餘文乾州市價更貴軍民苦之而河東場產不

旺細掣時形短絀臣聞河東一道除每年正雜各款開銷浮費竟

至一百餘萬兩之多而應解甘餉五十二萬兩則積欠甚鉅一任

號呼敦促從無一次大批旺解者查河東鹽務本係先課後引庫

款見存五十餘萬兩縱不能全局通籌隨時接濟亦豈可坐視飢

軍待潰不展一籌乃該道則必俟乙年而始開解甲綱之銀遞年

積壓儼成定例殊不可解前任道員楊寶臣廉倨有聲不曉事理

見任道員李慶翱鄙詐成性惟解鑽營宜乎山西之鹺務不能振

興甘肅之餉源日形涸絕也臣前在閩浙因鹽務敗壞至極奏調

道員吳大廷署福建鹽道變法疏銷積引力除中飽通計一年徵

獲銀六十餘萬兩而商民稱便臣去閩後照章收課閩每年仍可四十餘萬兩足徵理財在於用人有治人然後有治法古語匪虛河東鹺道一缺若得廉能勤慎如吳大廷者委任而責其成功則浮費必裁正課必裕效可逆覩而甘餉亦期其得濟矣臣餉事奇絀焦灼萬分偶有思慮所及不得不瀝陳於君父之前不自知其有當與否上諭軍機大臣等左宗棠奏陝境肅清馳赴涇州及甘省窘迫情形並遵旨覆陳各摺片陝西土回各匪疊經官軍剿辦全境肅清本日已明降諭旨宣示其老巖窩出力員弁人等著准其擇尤彙案請獎董幅祥等倡亂多年見以窮蹙投誠難保不心懷叵測左宗棠赴甘在卽應如何妥爲安插無滋事端之處仍著悉心籌畫交劉典妥爲辦理所陳劉松山等軍分路前進馬德順等馬步各軍暫駐靈臺以策應南北兩路均合機宜卽著督

飭諸軍整旅遄征迅圖掃蕩該大臣抵涇州後卽祇受督篆任事以一事權陝西征兵盡出金順見赴烏喇磴口等處該大臣勢難兼顧北路著卽會同定安金順規度情形飭令宋慶張曜兩軍合力堵剿郭寶昌一軍向與劉松山合力剿賊均稱得力見在應否會合劉松山軍截剿南靈之賊著左宗棠酌覈辦理該大臣奏稱宋慶張曜郭寶昌三軍各減營數則餉足而軍愈精所籌不爲無見其應否裁減之處卽著定安金順會商宋慶張曜妥籌辦法其郭寶昌營勇著左宗棠飭知該提督精爲遴選以收飽騰實效所有該三營餉需已諭知李鶴年英翰吳坤修照舊按月批解甘餉見值奇絀未便多容客軍所奏亦係實情潘鼎新陳湜兩軍已分飭李鴻章等分別遣撤並令該員等於撤勇後各赴該大臣軍營聽候差遣至遊擊周欽輝等被殺一案仍著會同劉典確切查明

按律懲辦該大臣入甘後務將軍事吏治悉心整頓以維大局邊外情形何似定安等務當懷遵前旨督飭德昌等分投追擊以靖邊氛將此由六百里各諭令知之○諭山東布政使潘鼎新前經諭令帶勇赴陝隨同剿匪茲據左宗棠奏稱陝甘餉事窘迫各路兵勇過多勢難支持請將各軍分別裁撤等語潘鼎新所部勇丁卽著李鴻章丁寶楨英翰吳坤修傳知該藩司妥爲遣散並著潘鼎新於兵勇遣散後仍前赴左宗棠軍營聽候差遣該藩司所撤之勇籍隸安徽者多遣撤後並著英翰吳坤修飭屬妥爲安插毋任滋生事端將此由五百里諭知李鴻章丁寶楨英翰並傳諭吳坤修知之○張岳齡以病免以崇福爲甘肅按察使由學素○予陝西傷亡總兵官喻先恕甘肅殉難知縣楊炳華祭葬世職○丁酉雨 上詣 大高殿報謝○諭軍機大臣等定安等奏剿賊績

勝磴口見無賊匪金順奏近日花定防剿情形由榆林進規烏磴
各一摺回匪自竄入鄂爾多斯旗境後復在上永和姜寨內盤踞
經烏爾圖那遜督率吉林黑龍江馬隊官兵力攻南門賊匪抵死
守禦成山等由西北角攻入寨內賊由南面奔逃追至磴口地方
沿途擒斬甚多其乘隙藏匿者均搜殺淨盡並將河內渡船燒毀
見在磴口踞匪回竄邊內包鎮地西至磴口黃河北岸已無賊蹤
剿辦尙爲得手此次出力官兵著定安等擇尤彙奏奏保刻下賊
匪雖遠遁邊內大股尙踞靈州一帶誠恐被剿情急仍復鋌走草
地昨據左宗棠奏督師入甘派劉松山一軍由西北進指定邊花
馬池截賊東趨之路已令其會商定安金順妥籌兼顧並令酌度
情形飭郭寶昌與劉松山合軍截剿甯靈之賊該將軍等即可咨
商辦理烏爾圖那遜見撤隊於烏蘭木頭是否足資控禦仍著定

安桂成責令該副都統擇要嚴防不可稍涉大意並一面飭令會合達爾濟等確探賊蹤乘勝進剿西路賊匪蓄意竄擾花定經富勒琿常福連番追擊賊向西遁常福帶隊回榆惟花定距靈州賊巢不遠難保該逆不糾眾回犯磴口見已無賊劉松山業向花定前進該署將軍應在何路扼剿著卽酌量辦理前據定安等奏稱宋慶後隊調紮皇甫川張曜酌帶數營前往纏金磴口其餘隊伍仍駐古城等處此時磴口纏金無賊該兩軍應於何處扼紮聯絡金順馬步各隊以資堵剿並遙爲包薩屏蔽之處著定安等彼此妥商嚴密布置毋誤事機將此由六百里各諭令知之○諭劉典奏見擬回省督同司道整理地方等語陝省自董志原克復後回逆西竄境內漸就肅清劉典自應回省經理地方各事務見在左宗棠統師入隴陝省應辦各事該署撫責無旁貸所有安撫難民

開種荒田一切善後事宜均著劉典盡心籌畫毋得稍有粉飾延
安一帶土匪如董福祥等雖已投誠是否尙聽約束老巖窩雖已
克復此外零星股匪一時恐難淨盡務當隨時勦辦毋任日久變
生復爲民害劉厚基等駐紮北山所部勇丁必當嚴禁滋擾該處
地瘠民貧久經兵燹必須廉謹之吏實心任事方能撫綏安集著
劉典督同藩司慎選良吏以安地方回逆雖竄甘省設左宗棠到
甘後奮力攻勦難保不回竄陝疆磴口等處踞匪經定安等派兵
進剿據報竄入邊內難免不乘虛東竄該署撫俱當綢繆未雨免
致臨時周章左宗棠派劉松山魏光燾黃鼎等軍分路西征其餘
勇隊畱存陝境者想尙不少與甘毗連處所何地可以扼要是否
均有得力兵將駐紮均當早爲籌及並將如何嚴密布置之處詳
細奏聞以慰厯繫該署撫既回省中仍應檄飭駐守三原文武員

弁嚴束營勇以壯軍威嗣後務當實事求是虛衷集益竭力整頓
地方毋負委任將此由四百里諭令知之○于陝西陣亡參將德
貴等祭葬世職○戊戌諭軍機大臣等有人奏穆圖善扭於議撫
實誤聽首府舒之翰遊擊蕭兆元之言去秋藩司林之望等探知
賊目不和齊向該署督懇請率眾進攻而舒之翰百計阻撓或言
兵勇未齊或言軍餉不足並暗中慫恿署督面斥林之望爲生事
激斥總兵胡昌會副將范銘爲擅殺以致眾軍憤恨僉云蕭兆元
係回匪頭目暗中爲賊耳目舒之翰得受回匪重賂故凡事爲賊
道地不知是何肺腑在首府任內大開壽筵廣受祝禮各州縣紛
紛餽送多則千金少亦數百有不送者伊則贊惑督臣立即撤參
請將舒之翰蕭兆元嚴行審辦等語穆圖善辦理甘肅軍務雖因
餉拙兵單不得已而權宜議撫而舒之翰等阻撓戰事以致軍心

解體如果所參屬實亟應嚴行懲辦以儆官邪著左宗棠按照原
參舒之翰蕭兆元各情嚴密訪查據實參奏毋稍輕縱將此由四
百里諭令知之○已亥諭內閣禮部奏遵議左宗棠等奏請補行
陝甘鄉試一摺陝甘鄉試前因軍務久未舉行見在陝西全境肅
清甘肅之涇慶各屬亦已安謐著准其於本年特開一科補行壬
戌恩科及甲子正科鄉試陝甘中額向係合併取中甘省軍務未
竣各屬士子未能一律赴試自應酌留中額以昭平允著照左宗
棠等所議辦理其恩詔廣額亦著照禮部所議取中○以李宗羲
爲山西巡撫梅啟照爲江甯布政使由廣東督糧道遷○庚子馬新貽奏
擊散海阜匪船諭檄軍山

以捕